



Adresseinformasjon fylles inn ved ekspedering.  
Se mottakerliste nedenfor.

Dato: 16.09.2019  
Vår ref: 18/03506-15  
Deres ref:

## **Tildeling av driftskonsesjon etter minerallova for Gaular Næringspark i Gaular kommune. Tiltakshavar: Gaular Pukk og Sand AS.**

Leiv Erikssons vei 39  
Postboks 3021 Lade  
N-7441 Trondheim

**TELEFON** + 47 73 90 46 00

**E-POST** post@dirmin.no

**WEB** www.dirmin.no

**GIRO** 7694.05.05883

**SWIFT** DNBANOKK

**IBAN** NO5376940505883

**ORG.NR.** NO 974 760 282

**SVALBARDKONTOR**

**TELEFON** +47 79 02 12 92

Direktoratet for mineralforvaltning med Bergmeisteren for Svalbard (DMF) visert til søknad om driftskonsesjon, motteke ved DMF den 24. september 2018.

### **1. Tildeling av driftskonsesjon**

DMF tildeler Gaular Pukk og Sand AS, org. nr. 915 759 637, heretter kalla «Tiltakshavaren», driftskonsesjon etter minerallova § 43.

Tiltakshavaren får driftskonsesjon for uttak av fast fjell i Gaular Næringspark på del av eide domane gbnr. 61/89 og 61/136 i Gaular kommune. Mineralførekomensten hører til kategorien mineral som grunneigaren eig.

Konsesjonsområdet har eit areal på om lag 37 daa og går fram av kart med tittelen «Konsesjonsområde Gaular Næringspark i Gaular kommune», produsert ved DMF den 14. mars 2019 vedlegg 5.

Området er i reguleringsplan for Gaular Næringspark gnr. 61 bnr. 20 mfl. med planID 20170001, vedteken i kommunestyret den 26. april 2018, regulert til forretning/kontor/industri og steinbrot og masseuttak.

Tildeling av driftskonsesjon erstattar ikkje krav om andre løyve, godkjenning, arealavklaring eller konsesjon etter anna lovgiving. Tiltakshavaren er ansvarleg for å innhente andre nødvendige løyve.

### **2. Vilkår for driftskonsesjonen**

Konsesjonen blir gjeven på desse vilkåra:

#### **2.1. Driftsplan**

Drifta skal til ei kvar tid gå føre seg i samsvar med ein driftsplan godkjend av DMF.



Dersom Tiltakshavaren ønskjer å gjøre vesentlege avvik fra driftsplanen, skal DMF godkjenne dette på førehand.

DMF kan krevje ny oppmåling og at ajourførte kart og profilar skal sendast inn når DMF finn det nødvendig.

## **2.2. Økonomisk sikkerheit**

Tiltakshavaren blir pålagd å stille økonomisk sikkerheit med NOK 750 000,-, som skildra i punkt 5.11 av vedtaket, for å sikre at nødvendige sikrings- og oppryddingstiltak blir gjennomførte etter minerallova §§ 49 og 50, jf. minerallova § 51.

Den økonomiske sikkerheita skal stillast i form av ein bankgaranti for eit grunnbeløp på NOK 300 000,-, og deretter årlege avsetjingar til ein bankkonto som det skal etablerast pant i til fordel for DMF slik at Tiltakshavaren ikkje kan råde over kontoen på noko vis, begge deler som skildra i punkt 5.11.

Innan 2 månader etter datoén på dette konsesjonsvedtaket skal Tiltakshavaren ha:

- (i) inngått ein avtale om finansiell sikkerheit med DMF, vedlegg 1;
- (ii) lagt fram påkravsgaranti frå bank som DMF vurderer som tilfredsstillande, vedlegg 3;
- (iii) etablert pantet til fordel for DMF, jf. pantelova §§ 4-4 til 4-6, vedlegg 2.

## **2.3. Bergteknisk ansvarleg**

Det skal utan grunnlaust opphald sendast skriftleg melding til DMF om alle skifte av bergteknisk ansvarleg for eit uttak.

Ein bergteknisk ansvarleg for uttaket, med dei nødvendige kvalifikasjonane, skal vere på plass innan 2 månader etter datoén på dette konsesjonsvedtaket. Innan same dato skal Tiltakshavaren melde inn til DMF namnet på den ansvarlege og leggje ved meldinga dokumentasjon på at personen fyller krava til bergteknisk ansvarleg. Dersom verksemda skal leige inn den ansvarlege, skal dokumentasjon på avtalen mellom Tiltakshavaren og den bergteknisk ansvarlege leggjast ved meldinga.

## **2.4. Andre vilkår**

Den regulerte føremålsgrensa for massetaket skal setjast ut eller markerast i terrenget på ein slik måte at den er lett synleg gjennom heile driftsperioden.

## **3. Godkjenning av driftsplan**

DMF godkjenner driftsplanen for Gaula Næringspark. Den godkjende versjonen av driftsplanen ligg ved dette konsesjonsvedtaket, vedlegg 4.

## **4. Høyringsfråsegner med kommentarar frå DMF**

Søknaden om driftskonsesjon har vore på høyring, jf. forvaltningslova § 17, hos desse høyringsinstansane: Fylkesmannen i Vestland, Gaula kommune, NVE Region vest, Sogn og Fjordane fylkeskommune, Statens vegvesen Region vest, Sunnfjord Energi AS, samt andre høyringsinstansar slik det kjem fram av adresselista til høyringsbrevet og adresselista til dette vedtaksbrevet.



Høyringsperioden var frå 5. mars 2019 til 2. april 2019.

Frå høyringsfråsegnene har DMF særleg merkt seg dette:

Gaular kommune:

Gaular kommune understrekar til at reguleringsplan med plankart og føresegner må følgjast, særleg med omsyn til støv, støy og avrenning. Kommunen peiker på at kart over konsesjonsområde produsert ved DMF den 18. februar 2019 må vere feil.

DMF sine kommentarar:

*DMF harteke høyringsinnspelet til etterretning. Vi føresett at Tiltakshavaren følgjer reguleringsplan og føresegner slik de er gjeven av kommunen, og vil i den samanheng framheve at løyve etter minerallova ikkje erstattar krav om løyve, godkjenning, arealplan eller konsesjon etter anna regelverk jf. minerallova § 5. Når det gjeld merknaden til kart, blei DMF merksam på dette og har korrigert kart over konsesjonsområdet. Nytt kart ligg ved dette vedtaket og er produsert ved DMF den 14. mars 2019.*

Fylkesmannen i Vestland:

Fylkesmannen viser til at registreringa av vipe i området er av eldre dato, og at slik området er pr. i dag er det lite sannsynleg at vipe hekkar i området. Det vil difor ikkje vere naudsynt å gjere spesielle avbøtande tiltak. Utover dette minner fylkesmannen om at Tiltakshavaren må følgje krava i forureiningforskrifta kap. 30. Fylkesmannen framhevar innsending av melding med informasjon om verksemda. Meldeskjema ligg på Fylkesmannen i Vestland sine nettsider. I det tilfelle at det vert danna mineralavfall frå drifta må Tiltakshavaren lage avfallsplan for avfall i samsvar med avfallsforskrifta kap. 17.

DMF sine kommentarar:

*DMF harteke høyringsinnspelet til etterretning. Vi minner Tiltakshavaren om at dei må følgje føresegnene slik dei er nedfelt i forureiningsforskrifta kap. 30. I tillegg oppmodar vi Tiltakshavaren om å orientere seg om kor vidt verksemda er omfatta av avfallsforskrifta kap. 17 sine føresegner.*

Statens vegvesen:

Statens vegvesen skriv at tiltaket samsvarar med gjeldande reguleringsplan for området. Dei peiker på at det går en gang- og sykkelveg forbi uttaksområde og at tilkomstvegen til brotet kryssar denne. Det er difor viktig at siktsonene til ein kvar tid samsvarer med det som er oppgitt i reguleringsplanen. I tillegg viser vegvesenet til at det som konsekvens av inn- og utkjøring av uttaksområdet per i dag er ein del sand og grus i vegbana. Statens vegvesen oppmodar difor Tiltakshavaren om å gjere tiltak for å motverke dette då grus og sand på gang- og sykkelvegen er uheldig.

DMF sine kommentarar:

*DMF harteke høyringsinnspelet til etterretning. Vi understreker at Tiltakshavaren er forplikta til å overhalde dei føresegnene som følgjer av reguleringsplanen og reguleringsføresegnene til ein kvart tid. Eit løyve etter minerallova endrar ikkje Tiltakshavaren si plikt til å etterleve anna regelverk. Vi oppmodar også Tiltakshavaren om å syte for å ha eit bevisstforhold til at verksemda deira, særleg inn- og utkjøring av tungtransport frå steinbrotet fører til at gang- og sykkelvegen blir tilgrisa og i samband*



*med dette etablere gode rutinar og tiltak for å minimere denne ulempa for myke trafikantar.*

NVE Region vest:

NVE hadde ingen merknader i saka.

DMF sine kommentarar:

*DMF harteke høyringsinnspelet til etterretning.*

Sunnfjord Energi AS:

Sunnfjord Energi AS viser til at dei har elektriske anlegg i området. Dei peiker på at det ikkje må setjast i verk tiltak som vil forverre tilkomsten til deira nettanlegg og at terrengoverdekninga over kablar ikkje blir endra, eller at tiltaket vil medføre at høgda opp til luftleidningsanlegga blir redusert. Vidare viser Sunnfjord Energi AS til at dersom det må gjerast tiltak på høgspentnettet, kan det verte stilt krav når på året anlegget kan koplast ut jf. leveringsplikta i energilova § 3-3. Når det gjeld trafo, pumpehus og liknande i føresegnene punkt 3.11 vert det stilt krav om at frittståande nettstasjonar skal tilpassast andre bygningar med omsyn til form og farge. Nettstasjonane skal vere prefabrikerte og kjem ferdige frå fabrikk, slik at forma på dei er standardiserte. Utover dette hadde Sunnfjord Energi AS inga merknader til søknaden om driftskonsesjon.

DMF sine kommentarar:

*DMF harteke høyringsinnspelet til etterretning. Vi ber om at Tiltakshavaren følgjer Sunnfjord Energi AS si oppmoding om å syte for at tiltaket ikkje vil forverre tilkomsten til eventuelle nettanlegg for Sunnfjord Energi AS, samt at de ikkje utførar arbeid som medfører at høgda opp til luftleidningsanlegga blir redusert.*

Kvernafossen grannelag:

Kvernafossen grannelag viser til at dei representerer innbyggjarane i Løvfallsfeltet bustadfelt på Sande. Dette er det nærmeste bustadområdet til Tiltakshavaren sitt uttak. Grannelaget viser til at dei ikkje hadde merknader til reguleringsplanen for området og den aktiviteten som er føresett. Likevel presiserer dei at det er viktig for grannelaget at dei restriksjonar og tiltak som er beskrive i reguleringsplanen blir overhalde. I samband med dette framhevar dei særleg restriksjonane knytt til støv, støy og sprenging. Grannelaget meiner at føresegnene må følgjast gjennom den driftskonsesjonen som no blir tildelt. Dei peiker på at grannelaget sist haust opplevde til dels sterke rystingar ved ei sprenging, noko dei håper var eit uhell og at tiltakshavar vil syte for at ikkje skjer igjen.

DMF sine kommentarar:

*DMF understrekar at Tiltakshavaren er pålagt å følgje de føresegner som kjem fram av reguleringsplanen og reguleringsføresegnene. Eit løyve etter minerallova erstattar ikkje krav om løyve, godkjenning, arealplan eller konsesjon etter anna lovverk jf. minerallova § 5. Reguleringsplanen erei grunnføresetnad for at Tiltakshavaren skal kunne nytte arealet som råstoffutvinning, eit løyve om konsesjon endrar ikkje på dette.*

*Tiltakshavaren må drive i samsvar med dei løyve dei har fått. Merknader knytt til eventuelle brot på reguleringsplanen med føresegner skal handsamast av kommunen som rett mynde jf. plan- og bygningslova § 3-2. Når det gjeld restriksjonar knytt til støv, støy og sprenging, viser DMF til at dette er regulert i forureiningsforskrifta kap 30. I forureiningsforskrifta kjem det fram ulike føresegner som sett grenser for støyande aktivitet, støv og varsel av naboar i samband med eventuelle sprengingar. Det er*



*fylkesmannen som skal ha melding dersom det er mistanke om brot på føresegne som kjem fram av forureiningsforskrifta jf. forureiningslova § 81.*

## **5. Korleis DMF vurderer søknaden om driftskonsesjon**

Føremålet til minerallova er å fremje og sikre samfunnsmessig forsvarleg forvaltning og bruk av mineralressursane i samsvar med prinsippet om ei berekraftig utvikling.

Etter minerallova § 43 er det krav om driftskonsesjon frå DMF for samla uttak av mineralførekomstar på meir enn 10 000 m<sup>3</sup> masse og for alt uttak av naturstein. Berre den som har utvinningsrett kan få driftskonsesjon.

Konsesjonssøknader går gjennom ei skjønnmessig prøving før det blir avgjort om det skal gjevest driftskonsesjon. I vurderinga av om det skal gjevest driftskonsesjon skal det leggjast vekt på om søkeren er "skikka" til å utvinne føre komsten. Dette inneber at ein skal leggje vekt på om prosjektet ser ut til å vere økonomisk gjennomførbart, om det blir lagt opp til bergfagleg forsvarleg drift, og om søkeren har tilstrekkeleg kompetanse til å drive førekomsten. I vurderinga av om det skal gjevest driftskonsesjon skal det òg leggjast vekt på omsyna som er nemnde i minerallova § 2.

DMF kan fastsette vilkår for ein driftskonsesjon. Når DMF avgjer kva vilkår som skal stillast, vurderer direktoratet mange av dei same omsyna som er relevante for vurderinga av om det skal gjevest konsesjon.

DMF har vurdert konsesjonssøknaden slik:

### **5.1 Utvinningsrett**

Mineralførekomsten som skal utvinnast tilhører kategorien mineral som grunneigaren eig. Tiltakshavaren er ikkje grunneigar for konsesjonsområdet, og det blir difor kravd avtale med grunneigaren om utvinningsretten til førekomsten. Tiltakshavaren har i søknadsprosessen lagt fram avtalar med grunneigarane forgbnr. 61/89, 61/136 i Gauland kommune, som dokumentasjon for utvinningsrett.

Avtalane gjev Tiltakshavaren utvinningsrett til førekomsten på det området det er søkt om konsesjon for i avtaleperioden.

Etter DMF si vurdering har Tiltakshavaren utvinningsretten til førekomsten.

### **5.2 Arealstatus for tiltaket**

Konsesjonsområdet har eit areal på om lag 37 daa og går fram av kart med tittelen «Konsesjonsområde Gauland Næringspark i Gauland kommune», produsert ved DMF den 14. mars 2019.

Området er i reguleringsplan for Gauland Næringspark gnr. 61 bnr. 20 mfl. med planID 20170001, vedteken i kommunestyret den 26. april 2018, regulert til forretning/kontor/industri og steinbrot og masseuttak.

### **5.3 Økonomien i prosjektet**

DMF har vurdert årsrekneskapen med styret si årsmelding og notar for dei siste 2 åra. På grunnlag av opplysningane som er gjevne vurderer DMF bedrifa som økonomisk skikka.



#### 5.4 Driftsplan

For å sikre at kravet om bergfagleg forsvarleg drift blir oppfylt, finn DMF grunn til å ta inn i konsesjonen eit vilkår om at drifta til ei kvar tid skal gå føre seg i samsvar med ein driftsplan godkjend av DMF.

Driftsplanen skal vere eit styringsverktøy for Tiltakshavaren i gjennomføringa av uttaket, og eit referansedokument i samband med DMF sine tilsyn.

I samband med søknaden har Tiltakshavaren lagt fram eit framlegg til driftsplan for uttaket.

Framlegget til driftsplan omfattar heile driftsperioden og avsluttinga av steinbrotet. Skildringa og kart- og snitteikningar presenterer den planlagde brytinga av førekomensten innanfor arealet på om lag 37 dekar som søknaden gjeld. Det totale volumet fast fjell som skal takast ut er estimert til 150 000 m<sup>3</sup>. Det årlege uttaket vil variere med marknaden, men det planlagde uttaket per år er om lag 15 000 faste m<sup>3</sup>. Det er planlagt drift i 4 etappar. Det blir òg presentert ein plan for sikring og avslutting. Planen er å føre brotområdet tilbake til utbyggingsareal for næringsbygg.

Etter DMF si vurdering kan den vedlagde versjonen av driftsplan for Gaular Næringspark godkjennast. Ein finn at planen tilfredsstiller dei krava som DMF stiller til driftsplanar, og etter DMF si vurdering legg planen opp til bergfagleg forsvarleg drift.

Dersom det under drifta oppstår nye situasjonar eller andre endringar i føresetnadene for drifta, til dømes geologiske og kvalitetsmessige variasjonar, bør det likevel på visse vilkår kunne opnast for å gjere endringar og tilpassingar i planen. Dersom Tiltakshavaren ønsker å gjere vesentlege avvik frå driftsplanen, skal DMF godkjenne dette på førehånd.

Undervegs i drifta kan DMF få bruk for oppdaterte kart og snitt som dokumenterer den noverande situasjonen i uttaksområdet og status i høve til den godkjende driftsplanen. Det blir difor teke inn som eit vilkår i konsesjonen at DMF kan krevje at Tiltakshavaren gjer ny oppmåling og at ajourførte kart og profilar skal sendast inn når DMF finn det nødvendig.

#### 5.5 Bergfagleg forsvarleg drift

Kravet om at drifta til ei kvar tid skal gå føre seg på ein bergfagleg forsvarleg måte inneber at aktiviteten må vere i samsvar med tilfredsstillande faglege standardar for denne typen verksemد.

Etter DMF si vurdering er den føreslegne driftsplanen for uttaket bergfagleg forsvarleg. Ved vurderinga har DMF lagt vekt på driftsplanen for uttaket.

#### 5.6 Kva kompetanse søkeren har til å drive førekomensten

I vurderinga av om søkeren har tilstrekkeleg kompetanse er det den totale kompetansen som søkeren har tilgang til som skal vurderast opp mot kravet om å vere skikka.

Etter forskrift til minerallova § 3-1 skal alle uttak av mineralske ressursar ha ein bergteknisk ansvarleg.



Tiltakshavaren har i søknaden gjeve opp Arne Aarbergsbotten som bergteknisk ansvarleg for uttaket. DMF har ikkje tidlegare registrert denne personen som ansvarleg for uttaket i sitt register. Tiltakshavaren har såleis ikkje fått på plass ein bergteknisk ansvarleg for uttaket.

DMF tek inn som eit vilkåri konsesjonen at ein bergteknisk ansvarleg for uttaket, med dei nødvendige kvalifikasjonane, skal vere på plass innan 2 månader etter datoен på dette konsesjonsvedtaket. Innan same dato skal Tiltakshavaren sende skriftleg melding til DMF om namnet på den bergteknisk ansvarlege og leggje ved meldinga dokumentasjon på at personen fyller dei nødvendige kvalifikasjonskrava. Dersom verksemda skal leige inn den ansvarlege, skal dokumentasjon på avtalen mellom Tiltakshavaren og den bergteknisk ansvarlege leggjast ved meldinga.

Tiltakshavaren beskriv at dei er et selskap som driv med sprenging, knusing og sal av stein og knuste massar. I periodar har Tiltakshavaren også vist til at dei leiger inn Mesta til å bore og spreng i steinbrotet.

Etter DMF si vurdering vil Tiltakshavaren ha tilstrekkeleg kompetanse for å drive førekomsten når ein bergteknisk ansvarleg for uttaket med dei nødvendige kvalifikasjonane er på plass.

### **5.7. Dei miljømessige konsekvensane av utvinning**

I vurderinga av om det skal gjevast driftskonsesjon skal det leggjast vekt på omsynet til miljøet og kulturminne.

Det finst ein godkjend reguleringsplan for uttaket. Planskildringa i reguleringsplanen gjer greie for miljøverdiar i området og korleis uttaket vil påverke miljøet.

#### *Vurdering etter naturmangfaldlova*

Naturmangfaldlova § 7 pålegg alle offentlege instansar som tek avgjelder som påverkar naturen å vurdere planlagde tiltak opp mot prinsippa i naturmangfaldlova §§ 8–12. Reguleringsplanen, høyningsfråsegner og eigne søk i Naturbase og Artskart (gjennomførte i mars 2019) er lagde til grunn for vurderingane etter naturmangfaldlova i DMF si handsaming av søknaden. Det er ikkje kome fram opplysningar i vurderingsgrunnlaget som tyder på at uttaket vil kome i konflikt med naturverdiar i området.

Ifølgje planskildringa er det registrert viktig naturtypar nord for planområdet. Det er ikkje registrert spesielle verdiar med tanke på biologisk mangfold.

DMF reknar kunnskapskravet i naturmangfaldlova § 8 for oppfylt. Sidan uttaket ikkje vil ha nokon større verknad på naturmangfaldet og ein ikkje kan påvise at tiltaket vil påverke truga, nær truga eller verdifull natur, legg DMF til grunn at det ikkje er nødvendig å gjere vidare vurderingar etter miljøprinsippa i naturmangfaldlova §§ 9–12.

#### *Avrenning*

Det går fram av reguleringsføresegne at det ikkje skal gjennomførast sprengingsarbeid i planområdet før det er iverksett naudsynte tiltak for å hindre avrenning av sprengstoffrestar til Gaulavassdraget. DMF minner om forureiningsforskrifta kap. 30 og plikta til å melde frå til forureiningsstyresmakta ved



oppstart av verksemda. DMF understrekar at Tiltakshavaren har plikt til å halde seg innanfor dei grenseverdiane som er fastsette i § 30-6 av forskrifa.

#### *Konsekvensar av tiltaket for kulturminner*

Kulturminne er handsama som eit eige tema i planskildringa. DMF støttar seg til dei vurderingane som bleigjorde i samband med reguleringsplanarbeidet, og meiner at omsynet til kulturminne er sikra. DMF minner likevel om den generelle varslingsplikta etter kulturminnelova § 8.

På bakgrunn av det som er omtala ovanfor har DMF kome til at det ikkje finst faktorar knytte til miljø og kulturminne som tilseier at det ikkje skal gjevast driftskonsesjon eller at det er nødvendig å setje vilkår om avbøtande tiltak.

#### **5.8 Forholdet til omgivnadene og nærliggjande område under drift**

Mineralressursane skal forvaltast og brukast på ein måte som tek omsyn til omgjevnadene og dei nærliggjande områda under drift. Det er difor viktig at drivaren gjennomfører nødvendige sikringstiltak for å unngå skadar på eigedom, menneske og dyr.

Tiltakshavaren vil sikre uttaket slik at det ikkje vil vere til fare for menneske og dyr. Ifølgje Tiltakshavaren skal dei etablere eit sikringsgjerde, slik plankartet viser, innafor område avsett til vegetasjonsskjerm.

DMF har kome til at dette ikkje er avgjerande moment som talar mot å innvilge konsesjon.

#### **5.9 Kva tiltaket får å seie for verdiskaping og næringsutvikling**

Førekomsten det er søkt om driftskonsesjon for fell inn under råstoffgrupperinga: sand, grus, pukk og leire (byggjerastoff). Råstoffet blir brukt i produkt som det moderne samfunnet er heilt avhengig av og som blir brukte i bygg, vegar og anlegg.

Uttaket sysselset fleire tilsette samt genererer aktivitet hos andre næringsutøvande, under dette Mesta, som bidrar med boring og sprenging inne i steinbrotet. Tiltakshavarens aktivitet bidreg til å halde oppe sysselsetjinga og skape ny sysselsetjing i lokalsamfunnet/distriktet. Drifta kan òg ha ein positiv verknad ved å gje opphav til eller sikre eksistensen til anna næringsverksemd, eller ved at råstoffet kan vere ein strategisk innsatsfaktor i anna verksemd.

#### **5.10 Langsiktig planlegging for etterbruk eller tilbakeføring av området**

Reguleringsplanen legg nokre føringer for korleis uttaket skal avsluttast. Her framhever Tiltakshavaren mellom anna at «Kraterveggar og pallar skal avrundast i øvre kant med skråsprenging for å få ei naturleg avslutning». I tillegg at «Ny vegetasjon av stadeigne artar skal etablerast i overgangssonen». Det er vidare lagt inn ein føresetnad om at «Toppdekket bør vere min. 20-30 cm av naturleg grus og jord for at planterøttene skal kunne feste seg og ha høve til å ta opp vatn og næring». Føresegnene har også nedfelt at «Plan for revegeterering og terrengetforming skal lagast som del av driftsplanen. Revegetering og istandsetting av landskapet skal skje under og etter tiltaket er gjennomført».

Sjølv skriv Tiltakshavaren at det i starten av drifta vil vere behov for å nytte det ferdige uttaksområdet til lagring av Stein samt i den vidare drifta.



Etter DMF si vurdering er dei planane som finst for etterbruk eller tilbakeføring tilfredsstillande, og såleis ikkje noko avgjerande moment som talar mot å gje konsesjon.

### **5.11 Økonomisk sikkerheit**

I søknaden om driftskonsesjon har Tiltakshavaren, i samsvar med forskrift til minerallova § 2-1, gjort framlegg til korleis sikkerheit kan stillast. DMF fastset dei endelige krava til sikkerheit.

Tiltakshavaren har teke utgangspunkt i DMF sin rettleiartil økonomisk sikkerheit og plassert uttaket innafor kategori 2 for fast fjell. Tiltakshavaren har lagt til grunn eit årleg uttak på 10 000 til 100 000 tonn, samt eit totaluttak på inntil 500 000 m<sup>3</sup>/1 350 000 tonn. Vidare har dei vist til ein gjennomsnittleg høgdeforskjell i uttaket på mindre enn 30 meter, noko dei viser til at svarar til 2 pallehøgder. Dei har også lagt inn en føresetnad om NOK 35,- pr. m<sup>2</sup> opent areal. Ut ifrå dette har Tiltakshavaren kome fram til eit minimumsbeløp på NOK 600 000,-.

#### **5.11.1. Pålegg om å stille økonomisk sikkerheit og vurdering av kor stor sikkerheita skal vere**

Etter DMF si vurdering er Tiltakshavaren sitt framlegg til kor stor sikkerheita skal vere noko lavt. Etter forskrift til minerallova § 2-1 tredje ledd skal den økonomiske sikkerheita vere tilstrekkeleg til å dekkje Tiltakshavaren si sikrings- og oppryddingsplikt.

DMF har i si berekning av økonomisk sikkerheit teke høgde for kva det vil koste å sikre og rydde opp i området ved uføresett og plutseleg stans i drifta, eksempelvis ved ein konkurs hos Tiltakshavaren. Ein føresetnad i slike tilfelle er at Tiltakshavaren ikkje kan utføre sikrings- og oppryddingsarbeida sjølv, men at staten v/DMF må leige inn ekster kompetanse til å gjennomføre dette arbeidet. Dette betyr at vi må leggja inn ei sikkerheitsmargin med tanke på uføresette kostnader og kostnader til konsulent i berekninga av økonomisk sikkerheit. Dette kan også vere noko av forklaringa til kvifor Tiltakshavaren og DMF si berekning avviker noko frå kvarandre.

Etter ei konkret vurdering av tiltaket finn DMF at Tiltakshavaren skal påleggjast å stille finansiell sikkerheit på NOK 750 000,- for å sikre at naudsynte sikrings- og oppryddingstiltak blir gjennomførte etter minerallova §§ 49 og 50, jf. minerallova § 51. I vurderinga av kor stor sikkerheit som skal krevjast har DMF lagt vekt på: kor komplekst uttaket er, massetype, potensiell forureiningsfare, underjords- eller dagbrotsdrift, plassering og lokale tilhøve. DMF har òg lagt vekt på sine eigne erfaringstal for tilsvarande uttak, med tillegg for eksterne og uventa kostnader.

#### **5.11.2. Form for sikkerheit**

Det skal stillast sikkerheit i ei slik form at den ikkje vil gå inn i konkursbuet i tilfelle konkurs hos Tiltakshavaren, jf. forskrift til minerallova § 2-1 tredje ledd.

Etter DMF si vurdering vil det vere føremålstenleg at den økonomiske sikkerheita blir stilt ved bankgaranti og individuell fondsavsetjing til ein bankkonto som det etter ein eigen avtale om finansiell sikkerheit skal etablerast pant i til fordel for DMF, jf. pantelova §§ 4-4 til 4-6. Tiltakshavaren skal ikkje ha råderett over denne bankkontoen, som skal vere sperra til fordel for DMF.



### *Bankgaranti – oppstartsfasen*

DMF vurderer det som naudsynt at Tiltakshavaren, innan 2 månader etter datoens då konsesjonsvedtaket bleigjort, stiller ein bankgaranti som DMF vurderer som tilfredsstillande som påkravsgaranti for eit beløp på NOK 300 000,-. Dette er naudsynt for å ha tilstrekkeleg sikkerheit i oppstartfasen før fondet har nådd maksimal avsetjing. Storleiken på bankgarantien er fastsett på grunnlag av ei vurdering av kva som blir rekna for å vere tilstrekkeleg sikkerheit i denne fasen.

DMF kan fremje krav i høve til bankgarantien i desse tilfella:

- (i) Etter utløpet av Tiltakshavaren sin frist for å utføre naudsynte sikrings- og oppryddingstiltak som DMF godtek;
- (ii) Ved konkurs, opphør eller anna avvikling av Tiltakshavaren si verksemد; og
- (iii) Dersom konsesjonen blir trekt attende.

Ved melding til garantisten om at eitt av tilfella nemnde i punkt (i)–(iii) over har oppstått, skal DMF ha rett til å få utbetalt det kravet som blir gjort gjeldande etter bankgarantien, utan omsyn til motsegner frå Tiltakshavaren. Bankgarantien skal stå ved lag så lenge beløpet som står på bankkontoen ikkje har nådd NOK 300 000,-. Når beløpet på bankkontoen har nådd NOK 300 000,-, eller tidlegare etter skriftleg samtykkje frå DMF, fell plikta til bankgaranti bort.

### *Individuell avsetjing, avsetjingsperiode og storleiken på avsetjinga*

Deretter skal Tiltakshavaren setje inn midlar på bankkontoen årleg fram til totalbeløpet på NOK 750 000,- er nådd. Dei årlege innskota blir rekna ut etterskotsvis på grunnlag av masseuttaket året før. Det skal betalast inn NOK 2,27 årleg per tonn utteken masse.

Ved fastsetjinga av satsen per tonn utteken masse har DMF lagt til grunn at fondet skal byggjast opp over ein periode på like i overkant av 8 år, det vil seie om lag NOK 93 637,- per år. I søknaden er det rekna med eit uttak på 41 250 tonn/år, noko som gjev ei årleg avsetjing på NOK 2,27 per tonn.

Innbetalinga for masseuttaket må vere avsett innan 1. februar året etter.

#### **5.11.3. Rapportering og dokumentasjon**

Beløpet som står på kontoen skal dokumenterast årleg ved å gje DMF tilgjenge til ei oppdatert kontoutskrift. All avkasting på midlane skal godskrivast kontoen.

I tillegg finn DMF det naudsynt at Tiltakshavaren undervegs i drifta vurderer om den sikkerheita som er stilt er tilstrekkeleg til å dekkje kostnadene til sikrings- og oppryddingstiltak og gjev DMF tilbakemeldingar om dette. Dersom den fastsette driftsperioden for uttaket blir endra eller det skjer andre vesentlege endringar i driftsplanen, skal DMF informerast umiddelbart. Elles skal Tiltakshavaren kvart femte år gjere ei ny vurdering av om sikkerheita er tilstrekkeleg. Når vurderinga er gjord, skal Tiltakshavaren utarbeide ein rapport og sende den til DMF utan grunnlaust opphald.



DMF kan også ha behov for meir rapportering og dokumentering enn det som er skildra over, og finn det difor naudsynt å påleggje Tiltakshavaren plikter i så måte i konsesjonsvilkåra.

#### **5.11.4. Justering av sikkerheita**

Etter forskrift til minerallova § 2-2 første ledd andre punktum kan DMF gjere vedtak om endring av storleiken på avsetjinga, inkludert dei årlege innbetalingane frå Tiltakshavaren, og tidspunktet for innbetaling. Slike endringar kan også gjerast når som helst ved endringar i minerallova og andre relevante lover, forskrifter og vedtak.

### **6. Kor lenge driftskonsesjonen gjeld**

Driftskonsesjonen kan reviderast etter 10 år.

Driftskonsesjonen fell bort dersom drift ikkje er starta opp seinast fem år etter at konsesjonen er gitt. Det same gjeld dersom drifta blir innstilt i meir enn eitt år. Det kan søkjast til DMF om å forlengje desse fristane. Driftskonsesjonen fell også bort dersom:

- utvinningsretten for statens mineral blir sletta
- avtalen om rett til å utnytte førekoma av grunneigars mineral går ut
- skjønn ikkje er kravd innan eitt år etter at ekspropriasjonsløyve er gitt etter minerallova § 37 andre ledd bokstav a

Driftskonsesjonen kan ikke overdragast. Det gjeld også ved overdraging av utvinningsretten.

### **7. Plikter for Tiltakshavaren**

Tiltakshavaren har rettar og plikter som følgjer av minerallova med forskrifter.

#### **Meldeplikt ved oppstart og stans av drift**

Seinast éi veke før oppstart av drifta skal Tiltakshavaren sende melding til DMF. Tiltakshavaren skal også sende melding til DMF før drifta mellombels blir stansa eller lagd ned i medhald av minerallova § 44.

#### **Drifta skal utførast med varsemd**

Drifta skal utførast med varsemd, slik at skadane ikke blir større enn nødvendig. Etter minerallova § 48 skal arbeida heller ikkje føre til unødig forureining eller skade på miljøet.

#### **Forsvarleg sikring og opprydding**

Området skal sikrast slik at arbeidet ikke medfører fare for menneske, husdyr eller tamrein. Etter minerallova § 49 omfattar sikringsplikta også gruveopningar, tippar og utlagde massar på område som er knytte til konsesjonsområdet.

Etter minerallova § 50 skal området vere forsvarleg rydda mens arbeida går for seg. Etter minerallova §§ 49 og 50 skal området vere forsvarleg rydda og varig sikra etter at arbeida er avslutta. DMF kan fastsetje ein frist for når oppryddinga skal vere avslutta.

#### **Ansvaret til bergteknisk ansvarleg**

Bergteknisk ansvarleg har eit særskilt ansvar for å sjå til



- at drifta er teknisk forsvarleg og tek omsyn til arbeidstakarar, nærliggjande bygningar og omgivnadene elles
- at førekomsten blir avbygd på ein berekraftig måte
- at drifta til kvar tid er i samsvar med ein ajourført og godkjend driftsplan

#### Rapportering

Tiltakshavaren skal sende årleg driftsrapport til DMF via «Min side» på [dirmin.no](http://dirmin.no).

Når uttak av grunneigars mineral blir lagt ned, kan DMF stille krav om å sende inn sluttrapport, måledata og prøvemateriale. Dette gjeld dersom uttaket har mineraliseringar av vesentleg geologisk interesse.

#### 8. Rett til å klage

Partane i saka og andre med rettsleg klageinteresse kan klage på vedtaket i samsvar med reglane i forvaltingslova kapittel VI.

Fristen for å klage er tre veker etter at de har fått dette brevet. Klagen skal sendast til DMF for ny vurdering. Dersom DMF ikkje finn grunn til å gjere om vedtaket, sender vi klagen til Nærings- og fiskeridepartementet, som gjer endeleg vedtak i saka. I klagen må de gjere greie for kva de klagar på, og kvifor, og de må foreslå endringar.

Etter forvaltingslova § 18 og 19 har partane i saka rett til å sjå saksdokumenta.

For nærmare informasjon om minerallova med tilhøyrande forskrifter, sjå heimesida vår på [www.dirmin.no](http://www.dirmin.no).

Med helsing

Maria Lauritzen  
seksjonsleiar

Stine Borge Nordskag  
rådgivar

*Dokumentet er elektronisk signert og har difor ikkje handskrivne signaturar.  
Sakshandsamar: Stine Borge Nordskag*



Vedlegg:

Vedlegg 1\_Avtale om finansiell sikkerhetsstillelse\_Gauland Næringspark.docx  
Vedlegg 2\_Pantsettelseserklæring for enkle pengekrav\_Gauland Næringspark.docx  
Vedlegg 3\_Påkravsgaranti\_Gauland Næringspark.docx  
Vedlegg 4\_Godkjend driftsplan\_Gauland Næringspark.pdf  
Vedlegg 5\_Konsesjonsområde\_Gauland Næringspark.pdf

Mottakarar:

Gauland Pukk og Sand AS                  v/ Arne Aarbergsbotten,                  6973 SANDE I SUNNFJORD  
Harevegen 11

Kopi til:

Adresseliste